

29. sept.

Siunnersuut uunga: Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaata nr.xx,uu.qq 2016-meersup allangortinneqarneranik Inatsisartut inatsisaat.

(Aalisarnermut Piniarnermut Nunalerinermullu Naalakkersuisoq)

Naalakkersuisut Inatsisartut inatsisaata allanguallatsinneqarnissaanik siunnersuuteqarnerat Siumumit tigulluarlugu imaattumik oqaaseqarfigissavarput.

Qimuttunik qimmeqarneq qimmiuteqarnerlu aammalu qitsuuteqarneq pillugu inatsisartut inatsisaata allangortinneqarnissaata suliarineqaleruttorfiani, ilaatigut qimmeqarneq qimuttunik immikkut inatsisiliuunneqarnissaannik, pinngitsoorneqarsinnaanngitsumik inatsisartut inatsisaata allangortinneqarnissaa Siumumiit paasisinnaalluarparput, ugguuna, ukiuni qanittuni qimuttunik qimmeqarfinni nappaalasoqartarpoq annertunerusumik annikinnerusumilluunniit, aammalu ukioq manna qeqertarsuup tunuani Qeqertani ilulissanilu annertuumik eqqorneqaataasumik nappaalasoqarluni.

Tamanna tunngavigalugu Inatsisartut Inatsisaat nr18 1998-meersoq aammalu nr28 2010-meersoq kiisalu nr. 23 2011-meersut imaasa ilaasa allangortinneqarneranik suliaq manna aallaavilik Siumumiik ilalersorumavarput.

Inatsisissatullu siunnersuummi §21 imm. 3 qimuttunik qimmeqarfinni, qulakkeersimaneqarsinnaanera ajornartillugu inoqarfinni akiuussutissamik kapuiartorsinnaaneq kisiat periarfissatut atornagu inoqarfimmi najugaqartut akornanni kapuisinnaasunik qulakkeerinnissinnaaneq eqaannerusumik pisinnaanissaa Naalakkersuisunut kaammattuutigaarput Siumumiit.

Siumumiillu Qimmeqarnermi akiuussutissanik kapuisoqarnissaani pisortat akiliinissaat isoriffissaqartinnigilarput, maannakkut naatsorsuutigineqartut 2017-imi 4.5 mio. Siumumiillu oqaloqatigiissutigilluarusupparput siunissami akiuussutissamik qimmiuteqartut qimmimik kapitinneqartarnerannut pisussaaffimmik tamakkiisumik tigumminilersinnaanerat, takusinnaasatsitut ukiunut tulliuuttunut aningaasat illikartinniarneqartut annertujaarput, taakkualu qimmeqartunik namminermit akilerneqartalersinnaanerat misissorneqartariaqartoq Siumumit kissaatigissuarput, aallartinneqarnerisa pisortanik akilerneqareerneranni ukiut pingasut atasussaasut ukioq siulleq pingasoriaq kapuisoqareerpat aallarniutigalugu piginnittut tamakkiisumik pisussaaffeqalersinnaanerat aqqutissatut tikkuarusupparput.

Tamakkiisumillu qimmiuteqartut qimmimik akiuussutissalersorneqarneranni tiguisinnaappata akiliutigisartagaasa akileraartarnikkut aningaasartuutitut ilanngaatisinnaasaattut ilanngunneqarsinnaanerat Siumumiik misissoqquarput.

Siumumiillu qimuttunik qimmeqarfinni aammalu uumasuuteqarnermi qimmiuteqarfiusuni qimminut kapuutissanik toqqorsiviusinnaasunik qularnaarisoqarsimanersoq paaserusupparput, ilaatigummi ukioq manna qeqertarsuup tunuani Qeqertani ilulissanilu nappaalasoqalermat paasisat

ilagimmassuk inoqarfiit ilaat toqqorsiviusinnaasunik peqanngittut, taamaassappallu aningaasartuutaasussat annertunerusinnaanerat qularnaappoq, tamannalu tunngavigalugu kommunit oqaloqatigineqarsimangersut paaserusupparput.

Siumumiillu inatsissatut siunnersuummi allannguutaasussat taamatut oqaaseqarfigalutigit, ataatsimiititaliamut susassaqartumut aappassaaneerneqartigani suliareqqissaarneqarnissaa innersuupparput.

Karl-Kristian Kruse
Siumut